



Awaasiya

Leveled



Wolayttatto Doona



Ha gujo nabbabo maxaafay Yuu Essi Eyidiyappe (USAID) beettida miishshaa maaduwaa Seev Ze Childdirenee (Save the Children), Luxettaa Moconaynne Tohossa Dalgga Manttiya Luxettaa Beeroy issippe hashetin giigidi attamettidaagaa.

2009 M.L.



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>




Awaasiya

Kifilee 3

Saaminttay 25

Leveled



Luxissiyageetussi Kaaletuwa

Naati nabbabuwa doommanaappe kase misiliyanne huuphe yohuwa bessidi nabbaboy odiyoba malana mala oychchite. Nabbabi simmidi wurssettan de'iya oyshata zaarana mala oottite.

Nabbabuwappe kasetiya Mali be'o Oyshaa

Ha huuphe yohuwanne misiliya xeelliyo wode kaalliya nabbaboy aattiyo kiitay ayba gaada oppay?



Awaasiya

Asaa naati issoy issuwara de'iyo issippetetaa duussaa hemetan kanttidi aadhdhiyo corabati de'osona. Ha corabati asaa naatu duussaa suure ogiyan kaalettiyageeta. Ixxiyabaa gidikko duussaa hemetawu xube gididi duussay teeqqettanaadan oottana danddayoosona. Hegaa giishin asaa naatu gallassa gallassa duussan gayttiya pudettaynne dugettay sa'aa duussawu eeshshadan xeelettiyageeta. Issi baggaara qassi injjee, irkkoy, baachchaa aahoynne dumma dumma eeniya hanotaykka ubbawu issi wode issi mala gakkana xayikkonne de'uwan asay meeze tidobanne ubbikka eriyoba.

Asaykka de'wan sittaa minttettidi gelaa kessidi, quunaa sittissidi eenennabaa eenissidi de'anawu meretay immido giday de'iyo mereta. Issippe yeekkidi, issippe yexxidi, issippe ufayttidi, issippe kayyottidi, issippe tookkidi, sugidi, baaxetidi de'uwa maarayiyogeeekka asaa mehetuppe dummayiya eeshsha. Asaa naati hagaa oottiyogee wontto tana gakkikko giya hirggaa bari giddon oyqqidaba gidiyogee oossinne geeshsha woykko qoncce.

Gidikkonne kaalli kaalli polishin meeze kiyidi asaa naatu duussaa mal"ettiya maxine, sawettiya shuqo, meeccidi geeshshiya saamuna gididi erettees. Ha hanotata ay asinne ay heerinne ay wodiyinaninne polennan pee'ees gaanawu danddayettenna. Gaasoykka asa gidida ubbay asi ootti kanttiyobaa oottiyogee attennaba.

Issi ura woykko cita gidin deree hachchi hachchi oottiyobay he asay barina qonccissiyo oge gididi erettees. Yaaniyo gishshawu beni gidin ziino hachchi gidin wontto asaa oonatettaa qonccissiya woga geetettidi erettiyay ha malaataa. Wogaa giyogee qanttaara issi dere woykko heera asaa oonatettaa hekko giidi qonccissidi bessiya heregaa gaanawu danddayettees.

Wolaytta asaykka bari biittaa ayssanawunne merettiabata suure hemetissidi keedissiyo meezeed'eес. Kase de'iyabatakka ushachcha kushiyan oyqqanawu medhdhidoo asaa haariya wogay de'ees. Hagee wogay dere asaa beetenna woykko kushiyan oyqetenna aqonne buqura gididi happy ootti ekkidi go'ettiyoba.

Yaatiyo gishshawu asay wogaa baaso oottidi qaaxxiyo qaattan wogaara gayttenan pee'ijo gallassi baawa giidi doonaa kuntidi haasayana danddayettees. Ufayttiyo wode issippe buraaqanawu kayyottiyo wodekka taykki laa gaanawunne hanotatun ubban issippe eqqanawu asaassi issippetettaa wolqqa geetettidi erettees. Wolaytta biittankka hagaa hanotan merettidi asaa naatu gallassa gallassa duussan go'ettiyo dumma dumma wogati de'oosona.

Hegeetuppe amaridaageeta hagaappe kaallidi maaran mankkan qonccissanawu danddayettees. Hegeekka yeehuwa yettaa wogaanne qaxxaraa bullachchaa wogaa gujjidi haratakka haphphi oyqqiyagaa gidana danddayees. Muussaa ushshaa wogaa, maayuwa gittaa wogaa, daguwa yurppiya wogaanne hashiya zayyiya wogaykka asaa aqodan qoodettees.

Hachchi xuufiyawu hum "o woykko gita allaalle
gidiyagaa oyqqidaagee aawaasiya, edayuwa
wogaannee hegeetanne hegeeta haphphiya
wogaa gaanawu danddayettees. Ha qommon
qonccissanawu malidoogeetuppe ha xuufee wudidi
yootiyoy Wolaytta asay ooyettaa sigettanawu
go'ettiyo awaasiya wogaa. Awaasiya giyogee
naa"u mooretida uraa woykko citaa issoy
issuwara qofan maayettanaadan phalqettaa
mayzzidi, za'aa sikkidi giigissiyogaa.

Giigissiyogaa giyogee qofaa qofaara mayzzidi
naa"u yaraa giddon sarotaa medhdhiyogaa
giyogaa. Moorettida uraa woykko citaa
giigissiyogaa giishin mooruwa xekkay dumma
dumma gidanawu danddayees. Doonan kacettidi
morkkettiyogee, bollaa boshettidi warettiyyogee,
cadettidi shocettidi qohettiyogeenne hegaappe
daro xekkaa gakkiyogeeekka awaasiyan wurana
danddayees.



Mooruwan Awaasiya Beeraa

Qaalaa laamettidaagaappe doommidi shemppuwa woridaagaa gakkanaashin dumma dumma xekkan de'iya mooruwa woykko ooshshaa wogaa baaso oottidi giigissanawu danddayettees. Hegeekka heeray worees wottees giidi cuucumidi oyqqido aquwa maaraadan polettees. He aqoykka xaafettidi uttengan barina go'ettiya asaa haariya wogaa geetettidi erettees.

Ha wogay asaassi kawuwa seeraadan daannatiya aqo giidi asay ubbay ammaniyo buqura. Naaqettoogawu tumaa immidi ekkidi, mooridoogawu edatidi shemppuwa miidabawu gumiya qanxxidi, ekkidi giigissiyoy awaasiya wogaana.

Hagaadan oottidi asaa giddon sarotaa medhdhanawu awaasiya wogay gita beeraa kaa'ees. Awaasiya wogay guuttawu daruwawu pirdda keettaa simerettiidi wodiya xuuggidi hiiyyeesatetta soo gochchennaadan oottanawu gakkiyabi baawa. Pirdda keettan mooti eqettidi zaaruwa demmiyogee lo"obadan xeelettanawu danndayiyaba gidikkonne awaasiya mala lo"o gidenna. Pirdda keettan doosiya hiixxidi, kayaa naagidinne, murttiya qanxxiya kuushshan yibbaatissiyogee asaa haa mooriyabappe attin issippetetaa duussan maaddiyaba gidenna.

Hegaadan oottiyogee de'ana duussaa bollan karetta shaaraa mayzzees geetettidi qofettees. Wontto issippetetaa duussaa hemetan miyyiya xayidi de'uwa barkka suganaadan oottiyaba gidiyo gishshawu awaasiyan sigettidi birshshiyogaa mala murutabay baawa. Haraykka ha awaasiya oosuwan lo"obaadan denddanawu danndayiyabay xayenna.

Laggiyara, shooruwara, dabbuwara, bolluwara duuxxidi de'iyogaappe aggi awaasettidi tumaa xaa'attidi wurssiyogeeekka awaasiyan gidikko keehi lo"o. Wolayta asay tuma giyogawu wolqqaama sohuwa immiyogeeekka hegaassa. Hayseyiiddikka, "Tuma gin tum"o sohoy paxees," giidi tumawu de'iya bonchchuwa qonccissidi pирddaa keetaa biida yohuwakka guyye ekkidi makkees. Asa gidida ubbawu awaasiya giyo wode immiyo gatee gutta gididi beetenna.

Hegee ubbay awaasiya wogaa go'ettidi bari buqraa kessi bessidi haddirssaa ushachchaa ammantidi yohuwa maarayanaassa gidiyogee oossinne qonccea. Tumaa immidi woykko demmidi gelidi yohuwa kaaluwa aggidi dichchaa oosuwa eesoyanawukka awaasiyan wurssidi kurumiyyogee wolqqaama go"aara de'iyaba.

Hegaadan oottidi, wonttonawu qoppidinne
ashshi awaasettidi, sigaa medhdhiyogeenne asaa
bonchchiyogee issippetetaa minttidinne de'uwa
hashetidi kaalettanawu dooroy baynna oge. Hegaa
gidiyo gishshawu asay awaasiyawu shoobettidi
xeesettiyo wode bari qoppidobaa guyye aggidi
eenotaa bessidi heeraawu haggaazaa immees.
Hagee dere woga gidiyogaa ooninne odennan
baappe akeekidi kiyada baana geennan marxxi
maayidi hokki shamettidi keeda hanotan ekkees.

Kare perzzidi biyaba gidikko duussan bohettidi
keehippe qohettiyogaa akeekidi guyye simmiyo
hanotay de'eas. Ay keenaa qohettikkokka
mootuwawu pirdda keetti beennan koyrottidi
wogaadan makettanawu afalaa miccees. Ay
yoho gidikkokka, balidi eesotidi pirdda keetti
biichchidoba gidikkokka ekkanawu biyagaassi
kushiya immees.

Ubba yohoy makettennaba giidi balan qoppidi biichchikkokka yohuwa oyqqiya asawu booraa qachchidi koyro kayaa wogawu immees. Hegee asaa naati wogaassi immiyo sohuwanne bonchchuwa milxxi zirxxi oottidi bessiyogaa so asa gidennan allagaykka markkattrees. Issi issi heeraa wogawu wudaa immennan ixxidi hara ogiya kaallanawu kuuyiya asaykka wogay shammiyogaa dogidi gidenna. Hegeetikka oychchiyo wode zaariyobay wogaa zawaa sugennan bari ogiyara hemettiya zammaanatettaa yootoosona.

Eti giyo zammaanatetta gidikkokka wogaa zammaanatettan kammiyogaa gidennan wogaa naagiyo ogiyara gattidi oyqqiyaba gidiyogee oossinne qoncce. Yaatiyageetakka guyye oyqqidi asaara sigettiyo ogee wogay medhdhidoo awaasiya gaanawu danddayettees. Hegaassa wogaa xooniyabi appe zaradhdhidi kare kiyiyay baawa giyogee.



Awaasettiyanne Awaasiya Asaa

Awaasettiya asaa hanotaa xeelliyo wode bariyan, mattuman, de'uwa xekkaaninne hegeetanne hegeeta milatiyabatun dummatana danddayees. Leemisuwawu ekkikko naati heeraa naatuura oyettin eta keetaa keetaa asay shiiqidi kawushshan awaasidi sigettiyogaappe doommanawu danddayees. Cima asay zawan palamettikko, woykko issuwa koshshay haraa koshshaappe dummatikko gidduwan amarida phalqgettay kiyiyo wode awaasiyan kuuyettana danddayees.

Hegaadankka wolqqan padidi, eran cimmidi, miishshan balettidi phalqgettaa medhdhikkokka dere asaa wogan xeelettes. Wogaa daannatettan qurphphu ootti oyqqidi naaqettaagawu tumaa imissidi yohuwa woriyogeeakka wottin de'iyaba. Naaqqidaagaakkha edayidi yohuwa wogaa afalaa

mayzzidi awanne kiyennaadan naagidi bari heeraa saro wottiyogee asawu awaase woga.

Awaasettiya asay mattumankka dummatiyo ogee de'anawu danddayees. Aybissi giikko asaa naatu giddon merettiya issippetetaa duussan peeshshay macca asay macca asaa xallaara gidenna. Hegaadankka qassi attuma asaykka pee'iyoy attuma asaa xalaalaara gidenna. Giyay ogee gattiyo asaa giddon mattumaa shaahoy zagettidi uttibeenna gishshawu ooshshaa merettaa qaadaykka hegaa mala geetettidi qofettees.

Macca asay macca asaara ooyettana giidi barinaara palamettiya attuma asaa aggidi aadhdhenna. Attuma asaykka hegaadan attuma asaa xallaara ooyettana giyo seeri baynnan de'uwa oyshay gattido asay cima gidin yelaga gidin gede coo ooyettees.

Awaasiya poliya asaykka bariyan dumma dumma xekkan de'iyageeta walakkidi woykko gattidi oyqqanawu danddayettees. Awaasee heeraa cimatettan maccaa attumaa shiishshi oyqqanawu danddayees. Ha cima asay kare kuwan wottido oydiyan melchchi uttidi ayyaanan yashissidi yohuwa makkana danddayees. Hegaa giishin yohuwa makkiya cimay sooni giigissido oydiyan utti erenna giyogaa gidennan daroto kare kuway doorettiyo gishshataassa.

Cima geetettiyo yohuwa makkidi giigissiyo gishshappe attin bare xalaalaa baaso oottees giyogaa gidenna. Asay yohuwa makkiya asaa awaasiya ayyaanan haasayiiddi ubbaakka cima giidi xeesees. Ciman hashetiya asay mattuman macca asa gidikko cimiyo giidi bonchchidi nashshidi shoobbelettes.

Haray attoshin naati issoy issuwara ooyettin eta laggeti he sohuwan sigettiigikkokka ciman gelis giidi qoccissana danddayettes. Hiraaga cimay odidi gelissiyagee, hanqgettidi pokkissiyagee bariyan keehippe gita gidiyagee uttiyo yohoy qiiabaa deexxi ekkees gaanawu danddayettes. Yohoy bari eeshshaattoo eeshshaattoo ciman oyqettido gallassikka wuriiganawu danddayees. Ixxidi daridi gujo naqaashaa koshshiyaba gidikko hara gallassawu keerettiyo hanotaykka meeze tidaba.

Yohoy hara keeruwan be'etto geetettidi kuuyettiyyoy gujo naqaashaa koshshawu woykko hara cimaa gujuwawu xalaalaassa gidenna. Geelladan yohuwassi keettaawa gidiya asaappe paccikkokka hegaa mala kuushshaa bolli gakkanawu danddayettes. Qassi yohuwa keettawatuppe haddirssay woykko ushachchay yohuwa deexettikkokka yohoy ka"in be'ana giidi pinttiyogekka keeruwan zagettees.



Awaasiya uttiyo Gallassaa

Awaasee polettiyo gallassaykka wogaa baaso oottidi cimatun doorettees. Dooruwa gallassaa xeelliyan attumanne macca gallassa geetettidi erettiya gallassatuppe yohoy mahettiyoy macca gallassatuuna. Dere asaa ammanuwan woykko xeelan macca gallassata geetettidi saaminttaa giddon de'iya laappun gallassatuppe erettiya gallassati Masqqaynno, Hamuusanne Qeeraa gallassata.

Yohuwa makkawu doorettiyay ha macca gallassata gidikkonne ha "i wodiyan asay dumma dumma gaasotun Woggaa gallassaakka dooriyo hanotay de'ees. Ha macca gallassati aybissi doorettiyonaa giya oyshay denddanawu danddayees. Zaaroykka macca gallassati lo "o ayyaanaara de'ijo gishshawu he gallassatun

oosettiaboy murutees geetettidi qofettiyo
gishshataassa.

Ha doorettida gallasan asay yohuwa makkanawu
uttiiddi naatuppekka amaridaageeta ekkidi uttees.
Gaasoykka cima asay aadhdhi aadhdhi biyo
wode wogayne hayday bayyennaadan be'ay
markkattidi yiya yeletawu aatto giyo qofaassa.
He wodiyen naati yohuwa makkanawu uttida asay
awaasiya waatidi doommiyakkonne wurssiyakko
doomettaappe kuushshaa gakkanawu de'iya polo
hanotaa akeekoosona.

Yohuwa poluwan denddanawu danddayiyabay
yohuwa anjjidi doommiyogaa, hayseyidi
ammanttiyogaanne tumaa pilggiyogaa gidanawu
danddayees. Wolaytta asay yohuwa doommiiddi
attuma asaa, macca asaa, naatanne mehiya
anjjidi doommees. Attuma asay eessaara
oyssaara, macca asay bullukkuwara boborccuwara
ommarsso, naata dichcha kehay gakko, mehiya

adoy maatay sawo giyogee doometta anjuwa.
Yaatidi awaasiya wogaa yeletaappe yeletawu
zubbarenan yeletaappe yeletawu aatteetees.

Nabbabi simmidi zaariyo oyshata

Nabbabuwaninne ne buzo akeekan amppada
kaalliya oyshata zaara.

1. Awaasiya giyogee aybee?
2. Awaasiya asay aybissi go'ettii?
3. Awaasiyawu uttiya asa mattumay aybee?
4. Awaasee baynnaakko asay waananawu de'ii?
5. Nabbabuwa giddon “pilggiyogaa” giya qaalawu
gelo birshshettay aybee?

